

康  
對  
山  
先  
生  
集

康對山先生集卷之三十六

墓表

明進階光祿大夫南京工部尙書李公墓表

公諱善字宗元家世隴州人也高祖公賜高郵縣知  
縣配范氏生惟中以子昇貴贈浙江道監察御史而  
封其配某氏為太孺人并累官至浙江按察司副使  
配苟氏傅氏俱封孺人生子溥即公父也以太學生  
為某倉大使以公貴封廣西道監察御史配馮氏封  
孺人公少磊落有氣及長就學已及沒時名中成  
化丁酉鄉試明年戊戌第進士拜行人司行人能不

辱使命擢南京廣西道監察御史清理蘆鳳淮陽軍伍滌弊者誣人於今誦之弘治戊申有外艱辛亥改浙江道監察御史巡按遼東多所舉劾將吏不法者悉奏黜之遼東還陞河南按察司僉事值張秋河決上遣內外重臣提督塞河知非公不可於是悉以委公卒至底績

上甚嘉之因陞俸一級以內艱改湖廣僉事值荊襄賊何淮等作亂淮自為創平王而其徒至數百人子女財帛所過一空道路阻絕公召指揮呂高等諭議建策賊衆悉擒事聞

上命陞俸一級已而妖人熊彥和等作亂為號已定  
陰相應附者數萬人公命呂高等亟捕彥和等數人  
坐法而焚其應附人名籍人心用安與侈功倅償者  
異矣於乎仁哉已未陞山東按察司副使兵備臨清  
遷姦按偽時以為難甲子陞山西按察使持平慎法  
吏民畏之正德丙寅陞四川右布政使尋轉左秋弊  
政節公財察帆運衡重輕悉偹獨民賴焉獨故為番  
戒所寇而某番尤盛鎮巡詣

命將征勦而太監羅籥與公計事謂非兵十萬不可  
公曰師出十萬日費千金民困歲歉公私俱竭恐邊

事未平而內變復起柰何且番酋已知

朝廷用兵勦罪恐懼無以自計若遣人宣布德意宜必從之果不從然後舉兵未晚也於是遣王玉等入番宣諭諸酋欵服其長悉從玉來獻甲以降誓永為良民捷奏

上大喜賜大紅織金衣一襲白金十兩尋陞南京都察院右副都御史會考察京官公揚清激濁輿論允協俄陞南京刑部右侍郎而用法平慎凡事多稽援故事洎事定衆方服公長者有見云若盜冊人王真是其一也其事載公家集茲不載庚午陞南京工部

尚書正規省費先後所無有

勅命公提督修理

孝陵并懿文殿宇公量工聚材深有計度厥功垂成  
會有疾懇乞歸致上竟允之歸十有三年為嘉靖元  
年奉

恩詔進階光祿大夫有司備綵幣羊酒問勞於家人  
咸榮之又三年乙酉春秋八月癸丑卒於正綬距其生  
正統甲子四月乙酉春秋八十有二夫人周氏華亭  
教諭遷安周公之女先公卒其懿行自有志傳側室  
鮑氏劉氏皆貞淑類周云公有男子四人守經周夫

人出錦衣冠帶總旗七品散官娶唐氏亦先公卒守  
純州學生聘閻氏娶劉氏守綏娶梁氏守繼聘馬氏  
娶韓氏俱國子生三人者皆劉出女子四人長適典科  
閻徵周出次適鳳翔張珂又次適舉人閻桂皆鮑出  
季適千戶白豸劉出孫男子五人塘州學生娶閻氏  
珙聘閻氏璐珝瑄俱幼孫女子二人長聘閻鑒次聘  
王化民守純卜以是歲閏十二月辛巳葬公北原合  
周夫人之兆持叅議閻子明狀乞海有以表公之墓  
嗚呼公之名德嵬然在人居官居鄉無非可師乃奄  
忽傾逝前輩典刑後將焉賴然茲但以稍述公之行

事世次使後之觀者知為公墓而已顧一笏之石豈足以盡載其懿德哉海以鄉里晚生辱教有年今公已矣回視世稱達尊長者諄諄懇懇汲引後進復有幾人如公也於乎傷哉子守經雖不幸早死而嗣德優孝公卿之子亦鮮儼矣守純勤學廣志克綏先猷其進靡度而守綏守維皆爾雅自好裕然俱良公之心復奚恫哉今孫子彬彬繁衍昌大揆之古昔蓋龔疏所無也不亦盛乎不亦盛乎

明故文林郎大寧縣知縣許君墓表

君諱諫字廷言家世陝州靈寶人也高祖仕信曾祖

實皆世抱潛德祖聚為安定教諭有厚德大學教人  
不倦安定人至今感慕立祠祀焉生三男子以季子  
襄毅公之貴贈戶部侍郎其長曰通即君父也配何  
氏生君與其兄誼君天資剛毅幼從季父襄毅公學  
領朱氏詩遊縣學卓有時名九試不第弘治庚戌應  
貢入太學其志愈力然竟不合於有司也於是入國  
學監規不均及鄉學稅價太重上言於

朝或以為將獲罪於人君不恤也甲子拜清河縣知  
縣克新其政諸廢具舉當道者殊以為能後以戚里

莊田坐繫

詔獄改知臨晉君曰為民獲罪雖死不恨况改近地  
乎君至臨晉則慎法禁嚴偷薄民大悅服未幾以外  
艱歸服除改知大寧大寧俗尚朴略少文君又以文  
雅飭其政治更稱善偶病淋乃棄官歸徜徉梓里者  
十餘年敦族厚倫人無間言嘉靖乙酉三月二十一  
日卒由生正統己巳十二月十四日春秋凡七十又  
七云初娶李氏生女一適國子生鄭鍾繼娶王氏生  
女二長適李袞次適主簿張珍三娶王氏無出四娶  
呂氏生子三人嫡修備側室楊氏生子四人皆佇嚴  
作女二人長適散官張天祿次適李繼恩而嫡修信

佇儼皆縣學生可以嗣君休德矣孫子三人福安薛安安孫女七人尚幼未聘於乎予昔與君弟今學士廷綸侍郎廷羨同遊翰林每及其家世則恒述君修德砥行之事謂君因心孝友然試雖不獲第於科目而三令大邑俱有良名亦可以少畢其志矣予予栗娶君妹壻布政使楊君叔安之子則君從甥壻也比來靈寶君弟茂才廷陳率君諸子以狀洎志銘授予請予表君之墓道志言君撫故兄子介偉僕倬如已出雖老年寢疾言及二親與季父襄毅未嘗不流涕於枕其居常又以立身處家之道告戒諸子諸子

若僑信等又皆學文修行將具大售於時為世令人  
君之所以教於家者視所以施之官秩曾少異哉予  
南至魏畧訪函谷故蹟過梁村望及君墳突然與君  
先公之墳相翼蓋百世之安也其子孫興盛繁衍孰  
謂無所自乎夫前人以德昌庇其後後人益求其德  
衍其昌庇之福引而益長緝而益光則許氏之世雖  
百世可也於乎僑與諸弟尚其勗之哉

義官谷君墓表

君諱廷价字維藩許州臨潁人也曾祖良弼元時為  
嵩縣鳴皋書院山長

太祖定天下舉以為臨額學訓導祖文不仕父善為  
清水知縣娶某氏生君倜傥仗義而有口才少讀書  
習舉業不成援例為義官克家治鹽不廢清水公之  
業年六十又九卒蓋正德戊辰七月八日也先娶謹  
氏名案女有婦德克配於君年二十九卒滑水官舍  
中生子鍾仁舉弘治己酉鄉試仕為武功知縣鍾義  
義官女一適孟志學繼娶耿氏德似謹弘治辛酉亦  
卒生子鍾英舉正德丁卯鄉試鍾麟鍾鳳俱為縣學  
生女一適王紹側室郭氏生女一尚幼未許人而又  
有孫子七人亮音雍奇應奕下音雍皆縣學生曾孫

子一人蘭正德己巳二月二十一日君已與謹耿二  
孺人合葬古穎先塋之次矣又三年鍾仁以事來關  
中持憲副王曰良狀謂予請表之墓道夫予曩在京  
師聞臨穎諸公言君風流磊落甚奇異也乃後見吾  
令益得詳知其為人蓋天性疎曠倜儻自難以區區  
家人細務縛續狹小耳鄙諺曰恢恢脫脫其福不薄  
今視其子孫皆興盛賢茂遠矣哉故家移風如此也  
是豈為虛語哉是豈為虛語哉夫吾令在吾邑善弛  
張為治其風流磊落亦畧似君然敏辯不凡一時為  
令者莫加也詩曰教誨爾子式穀似之固不必以有

位言矣鍾英等又克艱於學將來之事所移光於君者奚可以數計於乎休哉

明故南京國子監典籍李君墓表

君諱崇光字宗顯其先故藍田人元季徙居高陵因世家高陵西吳高祖文秀生捨捨生剛剛生芳娶劉氏生君兄弟五人君少被擇為縣學諸生習朱氏詩成化甲辰有例生員出粟者得受業太學正德庚午以太學授南京國子監典籍典籍三年病癘與痢卒於官時甲戌九月二十六日年才五十六也配魏氏生男子二人長純次毅讀書欲為士女子四人長為

翰林修撰吾友呂仲木妻已封為安人次受聘孫氏  
歿又次嫁高尚質又次嫁三原學生卿世泰孫女子  
三人明年乙亥八月 日將葬君西吳先塋之次純

來持狀請表請墓石余曩與呂君遊呂君數數稱君  
孝弟能讓余以為美德後聞其營置家事井然有條  
理若稍見才度矣然當富厚充裕之地又能躬儉不  
奢宜其父視遠享乃止如此豈非數哉錦曰

嗟嗟李君厥德孔懋孝友恭和靡有畔厚聲遊大學  
其氣已豪富而克儉古聖所褒迨及典籍冊書之記  
惟勤勿斂是云謂只三歲宦成我續既優其陵方來

病乃弗瘳金陵高陵其道孔艱魂來雖進靈怡且安  
仲秋吉日永蒞玄室刻石告哀哉心用憇

奉政大夫光祿寺少卿進朝列大夫孫君墓表  
君諱大經字天常其先鄒平人也始祖進生信信生  
福福在金末守為總領入元為千戶有功鄉人推為  
鄒平縣丞長子希武襲父職征海州中流矢死生三  
子其季曰旻生六子其次曰惟方惟方生繼祖繼祖  
生讓讓生四子長曰本從

太祖皇帝汎掃胡元隸濟陽衛追胡至灰山戰死其  
弟智繼之戰亦死弟雄復繼之改隸燕山護衛從

成祖皇帝內靖及追胡功最多陞羽林右衛指揮使後改潼關衛君之高祖也雄生子真未及襲而卒遺子鑑襲其祖職生二子長煎襲而有聲於官配淑人盧氏生若兄弟五人君長當襲顧欲舉進士於是父命入衛學浮梁先生提學試而奇之予之廩有決科之譽弘治己酉果舉陝西鄉試高等累試禮部不第弘治辛亥石淙先生提學陝西君受學焉先生語人曰孫生治世之才也舉進士不足以盡其人又七舉不利君心倦矣於是謁選為南陽府同知值劉齊作亂衆數十萬肆掠畿內泊山東河南守臣患之以君

督修南陽州縣城池民恃以無懼壬申

上命各鎮兵馬勦賊而君督餉遇賊與戰勝之有金  
幣之犒若職事清軍埋沒之弊積習既久理之殊難  
君多方鈎索解者幾二萬人御史以君為難於是以  
其法徧行郡邑又禁令所部民毋拾遺物夏聰首一  
袋來則河間生員李光祖沂遺君詰之金帛之數與  
袋中脗合事聞遠近具以為神明母政欺者又督州  
縣審徭里胥莫敢高下其手訟至迎刃而解撫按及  
總制大臣劄薦者五禮犒者三丙子考功於部明年  
丁丑超拜南京戶部浙江清吏司員外郎即檄令理

天策諸衛倉其年八月以父喪西歸值太監黃玉守備潼關君子承宣以指揮使掌衛事見玉恣行無忌力拒焉二三檢人嗾玉劾其父子然後可以行事君與承宣皆下

詔獄部大臣知其冤竟無事歸已卯冬服闋復除南京戶部廣西清吏司員外郎委掌鳳陽糧儲革除姦靈軍民誦焉嘉靖元年壬午陞署郎中綏於其官部尚書令攝山東福建二清吏司事癸未考績得給誥加贈其父為鎮國將軍加封其母為太夫人配姚氏繼室居氏皆贈封為宜人甲申官授郎中階奉政大夫

夫六年丁亥君被微疾以母老思歸乞致仕上以君恬退可嘉從之陞光祿少卿七年戊子夏夫人卒其年秋

上追崇禮成推恩臣下君進階朝列大夫甲午閏二月七日君乃不起由生成化戊子正月二十一日享年六十又七生男子三人承宣承家承賓女子二人長嫁楊文次嫁劉心皆襲子也孫男子四人墳域里  
璽孫女子四人襲子彭益闢挺黎自新盛謙為所許  
婚云苗裔盛矣予與君交今忽三十八年義若兄弟  
承宜雖嗣承先緒歷官久英聲有加將來所進殆不

止此承賓勤學好問不幸早死承家馴雅有儀麟角  
鳳羽錯諸戶庭墳等各能奮志率武男子之事若君  
可無忝矣漢陂先生每與人語輒以兄呼君可覩其  
為人也君墓已封因更表其碑石如此後之君子考  
德揚休未必無感於斯文

明故處士許公墓表

公諱懋字遵道其先高陽人也代有聞人茲不欲述  
其始居閭中者曰進之仕宋為太常嘗曾休居咸寧故  
子孫世為咸寧人太常後三世生允巖巖生恭恭生  
濂濂娶麻氏生二子長曰許志次即公天性孝友謹

厚父早歿事母麻氏曲盡子道麻卒哀痛之至至於  
骨立葬祭之禮一無少違識者謹焉於允志尤極誠  
敬關中人蓋嘗傳之云志八十時公已七十餘其出  
入嘗親自扶持皓首龐眉同游里閈宛然伯康兄弟  
也有司數請為鄉飲賓堅辭不赴弘治己未十一月  
三日年七十八卒葬城南樂遊原先塋之次配魏氏  
處士欽女也莊重寡言笑克執婦德鄉黨聞其孝如  
公云生男子三人長璉成化丙午舉人勑仕偃師教  
諭進夏縣知縣次傑守家人業次琦正德丁卯舉人  
壺關教諭女子一人嫁為席鐸妻已死孫男子八人

擢擣供學生餘尚幼孫女子幾人其長者嫁張應旂  
餘幼在室又曾孫子女各一人魏孺人以弘治十三  
年九月六日卒其年六十三云正德乙亥秋予東遊  
華山過長安瑾以狀謂予曰先考妣棄不肖之養其  
葬已十七年痛惟存日俱有令德其形於家乎於鄉  
者可以考而知不肖今乃有以樹其墓石表章其遺  
休夫孝子之志仁人之所憫也况先考妣誠德實行  
固足為先生之所不棄是宜先生有以言也予傷世  
俗喜尚夸耀侈誕重誣其先人至聞許處士之行則  
心惕惕然以為難焉古所稱弗言而躬行者豈許處

上謂耶瑾能誠述其先人無溢詞美說豈踐形惟肖者邪刻之於石而教詔之雖千萬世可以知許處士無忝也

文林郎定邊縣知縣馮公墓表

公諱元廣字學甫上世湖廣當陽人也曾祖文俊元末携子添祥添賦五人徙居蜀大竹既而樂遂寧風土乃定家焉於是子孫世為遂寧人添賦生世營世榮初娶楊氏無子卒乃繼娶潘氏正德己酉五月十五生公方壯而潘卒事繼母李氏一如事潘世榮公善焉公聞鄉先生有蘇閭道者教人有方自負薪米

公諱榮字世華汝陽人也其先為澤人曾祖諱可道  
祖諱欽父諱宣皆有厚德長於鄉宣生公兄弟四人  
公天性淳篤孝弟超穎人以為難能一日外出有道  
人坐石上語曰若拜我我授以長生之術公曰長生  
術吾亦有之但使心如此石即長生耳讀論語至君  
子坦蕩蕩掩卷嘆曰終身誦之可也由是益崇謙讓  
與物無忤隣近皆曰李公古之長者公雖儉素而性  
喜急人之難治家訓子蓋麗質之流焉嘉靖丙戌十  
一月庚寅公有疾不起諱其生正統己巳月日  
享年七十八初娶樊氏繼陳氏皆盛族之子陳氏

父淮母葛氏幼鍾愛之不輕以許人笄年歸公貞靜婉淑宜於公每以弗逮舅姑為恨歲時蒸獻必恭必誠公好覽眺佳勝每遊必踰時而歸陳孺人脫簪珥以續不遠無吝色也處妯娌御僕婢恩嚴之用悉中肯綮洎於暮年就養宦邸訓婦撫孫足為世範生男子一人經甲戌進士初為吳縣知縣

上嘉其良治錫之勅命以封父母洎妻後為戶部主事員外郎中兩知青州西安循良之政超絕之才宏遠之器不但吏民敬畏教化興行而已行將光輔帝猷為世懿準而公與孺人之錫命方將輜輶而至

云女子一早歿孫男子三人輔堯輔治輔舜方俱疊  
疊向進若輔堯者予親試之將來所就不直科第也  
孫女子二人長嫁張自觀次嫁張孟寅其亂繁矣予  
觀張太史仲承為公墓銘稱公方面羨髯廣有豐背  
為凝福之器今觀吾知府君實孚厥語明年丁亥月  
日公已合葬城南七里叢善鄉陳孺人之兆至是知  
府君又以予表公之墓於乎源深而引長德盛而範  
茂古人所語於公於知府君豈不信哉輔堯已下蓬  
勃奮迅若川之方至奕世之後殆與卿耶之王扶風  
之馬並立為三將益不忝乎隴西之前裔也於戲盛

歲

對山集卷之三十六

康對山先生集卷之三十七

墓志

明故資善大夫都察院右都御史鄒公墓志銘  
公諱昊字宗大其先鄒衍之後也蓋有仕宋者隨高  
宗南渡居句容來蘇鄉曾祖保保洪武二十三年解  
馬長受軍丁於寧夏不能歸遂從馬姓娶鈕氏生公  
祖豫豫娶周氏生公父俊俊先娶劉氏生二子昇昊  
矣劉氏卒俊歸居不娶有相士謂曰君之相晚當生  
貴子於是鄉人力勸俊娶乃繼娶楊氏生公公幼與  
群兒戲端坐高蹠指小方畧觀勝負以為樂長者異

之十六喪父家道以衰公傭書供母見千戶者優禮  
待秀才奮然曰秀才亦人爾我奚弗若彼哉於是從  
周生折節讀書顧家貧夜無燈油乃就廟中燈讀之

讀書  
周生言於巡撫賈公嘉其志給燈油紙筆後選為衛  
學生陳公福慶奇之以女妻公弘治乙卯果中鄉試  
高等已未進士拜行人鈞陽公時在兵部與之語器  
之因數訪邊事或奏行之三年授江西道監察御史  
巡按山西揚清激濁風裁凜然陞山東按察司僉事尋  
謫真定推官值轉官盜掠行旅人莫敢擾公曰彼恃  
騎射爾吾民亦能騎射顧吾無以教彼烏敢當吾衆

於是懸金示賞不數月邏卒皆稱善射諸韃官多被  
捕獲乃不敢為盜俄傳謫公閬州判官百姓詣

關上書留公

先皇帝免之乃免閬州之命未幾復遷四川按察司  
僉事時蜀盜藍鄆方割合四省兵馬勦之無効公之  
至笑曰將不知兵柰何可勝於是擇精兵千人教之  
分為四隊隊各立長統之賊來逼城公夜出精騎百  
人舉砲擊營賊內潰我兵奮擊斬首四十餘級蓋用  
兵以來所絕無者軍中皆喜公曰戰雖火勝賊心未  
寒胡足為喜遂乘勝逼發遇賊大營賊列陣於左伏

兵於右公以正兵攻左親率精兵千騎樓伏伏兵驚  
潰自相蹂踐戕擊死者不可勝計乃舉火焚柵明日  
追賊百餘里斬其首賊方四降者萬人餘黨咸遁公  
下令曰此後擅殺人者抵命於是驅掠從賊者人人  
皆棄生全矣總制洪鍾巡撫林俊會舉陞川東道兵  
備副使及得麥子山之捷賊避居川北有兵備副使  
張思齊與巡撫高謀廖麻子欲就招安求臨江市住  
劄必徙臨江市民彼方肯降公曰臨江市蜀襟喉之  
地上達重叙下連湖襄其地饒腴其民富庶徙民養  
寇咎將誰歸公立賞飭兵獨務行勦賊因不敢掠川

東而伏漢州平琪未幾又集衆至二十萬竟反前約  
官軍戰皆敗績於是賊謀先破中江移兵成都高公  
瞿亟調公往公率精兵五千騎日夜追賊賊聞公至  
遂解中江之危而成都無事矣尋

朝廷改命彭公澤總制公與彭公合兵擊賊大破賊  
營斬其賊首廖麻子餘黨復立渝老人遁入東鄉山  
中會科道交章劾高公薦公以代遂

巡撫四川公與彭公議曰東鄉山大不便騎射某請  
率步兵三萬人深入九真坦列營四面分布守隘賊  
不能出亦不得據究窮而後招降彼必自縛其魁至

卷之三十一  
宋史  
公至九真賊果縛喻老人等四十餘人赴軍門給  
票以授降者令自歸鄉里蜀盜遂平彭公曰使早用  
馬公蜀平久矣比凱旋有駱松祥與遂寧渠縣之寇  
未息各稱萬人皆觀望喻老人為進止至內江遣火  
牌入賊營諭利害除松祥等十數人外餘皆聽撫松  
祥既擒與遂寧渠縣諸賊相繼捕獲伏誅奏

上升公右副都御史巡撫如故仍賞松祥子慶兒三  
保為奴乙亥冬虜亦不刺由西海至松潘張刺蜀民  
震恐公與總兵官張傑謀招大信小信土番令為鄉  
導大軍夜抵虜營虜驚潰遁去獲馬三十餘匹及采

物百十事捷

上加公俸一級茂州番攻城謂城故乏水公指泉穴得泉揚以示番番人解去歲丙子高拱筠連焚人普法惡鼓惑諸夷僭號據險肆行攻劫公率兵搗其巢穴降者萬計惟青山寨不下公曰青山寨高而無泉我絕其水口不數日賊當圍渴以死何復庸戰遣指揮何定據水口賊志果窘公曰賊今夜當遁可掣南方一面待之於是遣人諭寨夷曰今焚人子殺爾寨首級換水吃數日不下無噍類矣寨夷相向大哭中夜果下寨走生擒萬餘人渠首悉獲捷

上陞公右都御史蔭子夢鶴錦衣衛百戶時方以副都考滿公與其配及父祖已受三品誥命而蔭子夢陽入監公曰功成身退天之道也累疏乞休不允歲己卯太監劉允奉

勅取活佛案下三司措置銀百十萬兩巡按御史唯唯而已公但厚與允往來累月畧不及銀兩事允差人來議銀兩公曰此中絕有利害太監厚我我不忍置太監於水火之中而不抹也人還告允允詮異日見公曰公有愛允之言願有以教允也公屏去左右與允曰此行果公所願乎曰未也至彼果保其中途

無虞乎曰未也今日百萬銀兩果公自得不以分送  
幸乎曰未也公今費百萬求佛不成

朝廷究極所費能立舉百萬還官乎况此行活佛必  
不可致後患必不可免何以為他人掊克瘠民之民  
張大虛聲以賈實禍切為公不取也允流涕稱謝明  
日案下改百萬為十萬三司驚喜不知事自何出公  
卒不言所以語允者於人後巡接論允安靜

先帝賜

勑獎勵允愈益願為好人地方不擾公之力也後以  
微事下詔獄今

上即位特復其官公懇求致仕旣得

諭旨遂定居長安因自號曰東溪居士明年癸未省  
墓寧夏以宅與兩兄又買田以益之凡送終之具咸  
與處之戊子以復姓上請得允休休田里不求聞達  
公卿論薦累歲不乏

朝廷將用公而公不起矣時嘉靖甲午四月十四庚  
寅也由生成化乙酉十一月二日丙午享年七十夫  
人陳氏生男三人夢鶴夢龍夢陽夢龍亦國子生女  
子三人長嫁指揮盛恩次嫁生員保召季嫁指揮何  
坤孫女子一人夢鶴出也陳夫人先公卒公英年錄

居矢不再娶訃聞特

賜葬祭生榮死哀若公可謂難矣今年丙申十二月十五日丙申夢龍等將葬公長安第五橋風涼原新塋合陳夫人之兆以狀請銘於予予於公有厚交義不可辭偶憶公處陳翁事嘗以為人所難能陳翁卒時子聰十一歲妹三歲也撫而教之至於成有家室骨肉之際盡其心以俟天公獨有焉銘曰 逖矣維鄒苗裔肇衍仕於東京歿宗已顯徽欽旣比高乘南覲乃居句容苟以無憇曾祖至夏番滯莫返冒姓三世我鄒方寢施於封君積善實遠篤生東漢高經飫

典膳仕

昌朝何往弗善觀風三晉貪滌咸剪旣進乃蹶我履彌闢復僉蜀臬殞羊噬犬赫赫厥徵才猷畢展節鉞所臨孰若席卷內難不生外侮悉殄

天子悅懌廟堂稱鮮分席臺端安危是覩中心鑒盈聿懷嗟歎東溪十年何興弗遺五橋之阡與儻同掩勸在太常名留琰琬丈夫有懷維公克踐我銘不阿公兆若峴予孫勉哉世萬奚忝

明故承德郎戶部貴州司主事閻君墓志銘

君諱倬字允章號山泉子太子太傅兵部尚書恒齋

公之季子也世為隴州人曾祖秀未仕祖璣宣德乙卯舉人歷仕南充嶽陽昌邑廣昌濟源教諭具以太傅貴贈通議大夫都察院右副都御史配王氏贈淑人生二子長仲實以進士起家累官吏部考功員外有盛德鉅名所為詩成化弘治間海內爭誦之予為諸生時嘗辱其與進益歐陽文忠之流焉次仲字即太傅公雅量宏度雖在顯頤而砥施罔究

武廟臨御之初固已兆有所尼之漸矣先配夫人仲氏生三子儒佑傳繼配夫人袁氏生二子俸及君君幼穎異不凡袁夫人夢鳳鳴樓屋上覺而生君暨乾隆

外傳日記千言不忘年十三即能詩與文伯兄知州  
君侃於寺中見其詩謂太傅公曰吾家能詩者此人  
也太傅公喜乃遣從谿田馬先生受胡氏春秋提學  
秦君文深器許之令補州學生己卯鄉試提學大復  
何子景明試竣西歸語予曰關中士吾得二人隴州  
閻倬延安董柵子幸識之後關中稱名士者必二子  
也是科二子果中高等予由是切慕二君之才君第  
後則不棄予過則必訪繢繙數日始歸予以其文采  
肖考功溫雅肖太傅士大夫或以予為知人後君登  
嘉靖己丑進士除知聞喜縣豈弟之政冰蘖之操吏

民感畏至不忍欺暎則課士勸學科貢不匱君之教  
也一時撫按旌賢舉最不可勝數乙未轉戶部主事  
民拔轔不忍去乃立碑頌德以東漢陳太丘內黃張  
問行武功李朝綱與君題為四君子可以知其政矣  
在戶部分理通州倉出納詳慎丙申總理三河大壩  
草場榷督伸縮悉有條理歲餘所起至十餘萬却廩  
餼慎獄訟三河人愛戴歌謡至不容口閒則日課一  
詩皆清新爾雅得詩人之意大後之許詎弗信哉值  
上郊社禮成推恩臣不贈太傅公光祿大夫柱國太  
子太傅兵部尚書昌黎大人一品太夫人丁酉督餉固

原事竣歸省太夫人遘疾具疏養病允之明年乙亥  
三月辛未竟不起矣於戲痛哉君世之懿寶也關中  
文獻乎方望君將實懸表以振厥衰乃若此天且胡  
以生君又且胡以弗壽於君豈天亦無柰於數而鬼  
神妬而奪之邪抑如李賀冀修文於天天受而闕之  
邪於戲痛哉君生弘治甲寅五月五日壬寅享年纔  
四十有六爾配劉氏布政使顯之女也封安人生男  
子二人錦州學生娶予弟貢士淳女次鑄未聘女子  
四人長嫁雲南參議郭田子生員中士次嫁戶部郎  
中邵伯宗子舉人景次聘引禮舍人張珊子某次出

育於房氏妹孫男女各一人俱幼君有遺詩二卷予  
將序而刻之君可以不死矣是年冬十一月九日壬  
寅鉅等將葬君於太傅公墓側介其女弟夫景出君  
姪鉶所具狀請予銘其墓石予知君者且又重以姻  
契義不可辭銘曰 窫竪惟闢關龍所瞻鳳起子紹

何用弗快睨彼科甲其易若探玉謝是並韋杜豈參  
繫君之才中壽而鈴大用弗寃視後則兼拊葬考側  
采叶我占遺德不泯遺詩可譜微懿考實世萬斯函  
明故封承德郎刑部主事張公墓志銘

公諱通字大亨家世長安杜陵人也上世譜失無徵

祖張大公生張二公張二公生公兄第四人而公長  
焉公生而秉德寡言笑不逐群戲十五能通大學大  
義張二公蓋異之令就學洎家道少衰乃令就賈二  
公曰有子如此弗能令振且達豈非命耶豈非命邪  
賈不數年其足跡已徧天下而諸關中言賈者皆出  
公下矣然公性憚厚利而僅取是曰苟可以給日用  
則生道所關如是而已夫何以厚為哉此其意慮豈  
庸人所能識哉成化乙巳關中大飢人相食也公諸  
弟方在襁褓而二公又不鮮作業公曰家無餘積而  
丁此大難親且老矣吾何以坐承其變於是轉雜襄

漢手足皆疲而家具溫飽二公謂公曰備穀防旱卷  
子防飢今於汝驗之矣遂泣數行下公亦數行下洎  
諸弟長成教令有立娶令有家二公又泣語公曰此  
諸兒我生之汝成之諸兒不忘汝吾將瞑目無悔矣  
故今閭中稱孝友者獨張公焉蓋其誠意惻怛出於  
天性如此云公娶高氏生男子二長治道甲戌進士  
初為長垣知縣有駿聲遷刑部主事娶田氏繼娶陳  
氏次治化娶安氏一女子未聘夭孫男子二人其苗  
裔漸以盛矣公生天順戊寅七月戊子卒嘉靖癸未  
五月己酉春秋六十有六明年甲申某月日將葬公

於曲江新阡治道表經奉狀來請予為銘予有居在長安書院坊蓋與刑部居甚邇從長老聞公行實與狀無少異公心雖孝友而天性剛毅正直與人交一本公道無所私曲人有過能面道之構者鮮失者復得容接者人人自以為喜此殆有古先長者之意焉刑部君曰正德丙子先人以先祖命視子長垣居無何一日方據案食忽棄筯太息曰吾心弗寧如此必吾親有弗安者即命駕遄歸適先母病居十日而先祖母卒四月而先祖亦卒身在數千里外而喘息呼吸與親無間非心之篤孝何以感應神速若此於

戲難矣哉嘗謂刑部君曰吾家世業農畝至汝方以  
進士取官吾宗顯矣汝何以自為哉又曰世自先曾  
以上皆無可考汝尚勵之此其微義大旨與司馬父  
子相告語者何異今刑部君操德砥行名實昭迥抗  
節超邁非公之所教耶當時舉重共文采予猶以為  
未故心敬好之弗專言焉於是為之銘曰 維大亨  
父蓄光不發留待厥子顯名方夏實承迺求以肇後  
始若彼巨匯先遂而微故至無紀苟官腰仕世所共  
尊義或弗齒故君子疾沒世而名弗稱千秋萬歲高  
岸為谷况此浮榮若大亨父下有厥子其道豈窮曲

江之阡峩峩屹屹子孫瞻哉可以永終

明故登仕郎 永壽王教授張君墓志銘

君諱儒珍字待聘別號東田居士上世固始人也元  
固始人被遷入關中七世祖盛兄弟五六人與俱來  
而盛占籍武功興城里盛生汝周文獻文獻生好禮  
好禮生敬為君曾祖配馬氏文簡公姊也生海配侯  
氏生讓配程氏生三子長卿次士廉季即君君生而  
孝友慈祥謹恪幼即嗜學十八充縣學生成化甲辰關  
中飢人相食乃與其兄奉其父母就食漢中洋縣凡  
衣食之奉百方匍匐親志用安不知其為流離也一

日自傍邑歸獨行山中幾百里許杳無人烟而饑懶  
已甚忽雲霾四合咫尺不辨君坐石上自分必死矣  
頃雲開見岩下有王瓜蔓數瓜纍然取啖之饑懶若  
失此孝感也居洋一年母卒君哀毀骨立洋之士人  
稱說其孝若不容口明年兄某奉其父歸又一年則  
聞父病劇君不辨衣糧不辭主人乃宵夜行至家不  
知是之重底也居數日而父卒哭泣之哀遠近嗟歎  
弘治己酉獨行至洋具小棺負母骨歸令斂於父每  
所至設香案雖簞食豆羹必祭而後食則跪告曰今  
日將適某處其孝有如此者傳記所稱殆何加焉君

讀書有大志累舉不利正德戊寅以歲貢拜河間縣  
學訓導又八年陞南皮縣學教諭所在以忠信教人  
雖豪生俠士亦服其教無敢易者彬彬之士懷若父  
母傳曰恭儉豈可以敷晉笑貌為哉如君者非其人  
耶嘉靖癸巳陞永壽王教授王以為長者殊禮敬  
之明年九月二十七日庚寅卒於官王重悲悼以  
為失吾良傳君生天順壬午五月三日丁酉享年七  
十有三娶予叔姊生六男子鑄鑰鉉鎬鑄鍊皆縣  
生而鉉鎬先君卒鑄鍊戊子同科舉人孫男子七  
孫女子七人其胤繁矣今年乙未三月二十二日

午鑄等將葬君於鳳岡之麓新兆請予銘君之墓於  
戲君與予同筆硯者十有餘年言必及義戰不抵譴  
至於俱老且死未嘗有芥滯弗合者亡友鳳麓符生  
嘗曰友道廢壞已久若束田子獨何人邪君孝友之  
心出於天授違親已久思念不忘諸甥言君在官見  
佳果美食未嘗不以享不逮親為言予獨諒焉關中  
之饑餓殍盈野君曰吾族寧無殍乎乃以俸金寄極  
貧者會極貧者絕粒已數日矣得寄即能延及麥成  
故其族獨無殍者君之孝友所及也君有才賢之子  
對客累無一言南皮張東之憲使清修之士也每以

君不譽子為士大夫之奇操予深謹之銘曰東田隆  
隆何福不豐帝監厥孝錫此令終維德覃厚履則斯  
宏旣畀賢子開廣厥宗益以多孫我張用崇振振翼  
翼允遨休鳳凰闢之麓厥土維融我言卜之作子幽  
宮後人克承茲兆彌窮猗千萬年光我秦封

承德郎刑部主事東希孟墓志銘

君諱野字希孟上世鞏昌人也高祖良元季守爾州  
兵亂居華州子孫世為華州人良生驥驥生果果生  
思中性行舉進士累官中議大夫贊治尹四川按  
察司副使夫人薛氏生男子五人周魯漢郊野皆命

治蔡沈書傳辟進士魯漢先舉於鄉君尚少也乃卒出遂連舉進士明年弘治癸亥除知陳留縣陳留道猶役繁民貧弊不能堪也君至一一更點約束恭已儉費使為民先又信賞集事疏道教化使清訟獄亡廩喧私闥也其故為盜掠者以無括歛能安生也往往變更為良人凡所以伸縮者道路傳之皆長者然性善惡惡人及豪強不決故往往見犯者皆務盡法王所舒緩焉河南撫按及布按重臣皆器重之凡所編籍及訟獄之事甘苦最難者故王不以委君君至果

一二有度理一時尹縣者莫能或之先也正德丁卯

吏部舉縣職以君年少佚資也但以刑部主事在刑  
部人皆曰不愧其先人蓋其先人按察公故為刑部  
郎中有平聞於今不窮也冬十月提獄禁至十一月  
朔歸歸即中寒又十四日乃不起今年纔二十又六  
於乎惜也已矣昔希孟言自兵燹來百十年北方弟  
子皆無書籍故陳留置書籍數十百種其有閒暇率  
弟子至躬自課亡日政廢不能矣使假之以年而益  
自宋肆向裏雖古人尚愧也於乎乃不然也卒之三  
日給事段君世高書狀來請為銘後二十日兄魯漢  
以試至則又請矣夫希孟性行純美其數修短如此

然視刻削近名者宜何以終焉嗚呼痛哉已矣希孟娶王氏已封為孺人子一命曰順壽甫一歲卒後二日又生女順壽神彩瑩澈宜有子矣銘曰年非修也而已終也官非卑也而已通也德非疚也而已窮也嗟嗟何也嗣有其子亡可斂也

亞中大夫陝西苑馬寺卿趙君墓志銘

嘉靖七年七月二十一日庚寅苑馬寺卿趙君卒於平涼官署又二十六日乙卯子蘇以狀來請銘其墓石君諱祐字汝承家世長垣人也與予同舉壬戌進士負氣抱奇穎銳不凡同年之士予切以君為難能

乃日以望君顯名於當時顧遽有是事獨非數哉夫  
天生美才如汝承宜必厚其培植使寃其所長位將  
頤矣長將漸矣乃倏焉云亡天於汝承胡為而生又  
胡為而奪哉世之所謂英雄豪雋之士有明毅之材  
者乏渾厚之氣彼自以為可無往而不善予寔隘焉  
於是則輒歎汝承天資之美為不可及而汝承又益  
之以學力昨予在鄖杜訪王子敬夫方共羨說汝承  
不置乃遽有是事於戲痛哉於戲痛哉按狀君父封  
吏部主事諱明配安人李氏以成化己亥十月十九  
日庚子生君即孝友天成比就小學灑掃應對長老

以為難率謂封君曰此兒言貌非常後必有大成立  
者無可以凡兒視也弱冠為縣學生毀譽不形造詣  
克敏甫出就試遂有名於場屋辛酉果中順天鄉試  
高等明年連捷進士年纔二十有四也未幾推擇為  
吏部驗封主事又兩改考功文選已乃陞文選署員  
外郎出為平涼通判尋陞同知未久陞西安知府在  
西安豈弟之政嘉樂之德浹於民心御史師存智曰  
當今循良之吏孰有可擬趙西安者雖予且以為名  
言乃不知其有要於君也尋復有他言

廟堂知君特厚但以調登州顧隱顯益明遂陞山西

按察司副使尋政提學予過鮮梁士子誦服其教無  
異言喜君之復優於是如所望當能究其所長也今  
年春君陞陝西苑馬卿予往華山第半程齟齬乃不  
得與君會方以為懊猶有旣在關內容有可通者乃  
不知君之竟如是也於戲痛哉君歷官二十七年以  
廉持身以公亮職以仁愛民以誠御吏以勤直事以  
恕待物居上不驕在下不謠諺所謂不任情以利己  
不毒心以害人君實備矣巡按御史端君聞訃驚怛  
謂君世之懿寶大美不終倏爾傾謝命官護喪念恤  
懇至西安之民大小稽首北面垂涕非君盛德孚於

上下何以有此此於君之宿志雖未悉究而所遇靡  
恫亦可以不愧有事固煥然君子之道也於戲盛哉  
君配王氏封安人生男子四人莊蘇萬莘莊縣學生  
先不幸死蘇勤學勵志足幹君盡萬莘雖幼俱英物  
也女子一人嫁縣學生殷渠明年己丑某月日附葬  
城東先塋禮也銘曰 天祐善人禆爾多福以莫不  
厚年僅五十位終三品朝為而朴溫恭其心顯明其

俊宜大厥授乃不克謂稽德取祥或在爾後爾後篠  
篠爾宗秩秩旣繁且秀逖德尤宗繼志廣孝天監孔  
祐長垣之東佳城之南永安爾哲豐碑載我龍章燁

燁世萬其懋

誥封太恭人王母劉氏墓志銘

太恭人者鄆縣英泉里人也家世有厚德為鄉人誦說父曰劉翁諱聚娶李氏生太恭人太恭人年十八歸中憲公中憲公甚宜之是時中憲公年纔二十有二為縣學弟子籍有時名太恭人事祖母焦夫人與姑李夫人曲盡孝敬然兩夫人則皆甚嚴中憲公父高年公兄第四人同井而居叔氏二人皆甚少晨昏之具尊卑之節處之實難太恭人周旋其間曲盡情禮矣李夫人猶時有督過之辭焦夫人曰新婦特少

爾使及爾年寧若是止邪蓋是時長清公方棄養家無厚蓄僅僕亦鮮井臼之任太恭人實躬操焉成化辛卯中憲公舉鄉試丁酉挈家卒業太學戊戌中憲公乙榜而悔恨不樂太恭人曰舅姑老藉此以盡菽水之奉未為不可也寧知他日事乎中憲公意始釋然於是赴巴縣教諭未幾關內大饑太恭人具麥麯肺肉令人相繼歸奉舅姑其族鄰鄉里流來巴者隨親疎多寡日與之餼洎九載滿歸太恭人乃出所有衣幣首飾壽李夫人李夫人歎曰姑氏言新婦孝吾初以為未乃今果然也弘治乙酉中憲公改祥符教

諭丙辰轉南陽府教授己未高年公訃至中憲公痛恨自擊面欲死太恭人曰君若此母氏當柰何於是中憲公悟乃不擊面而歸治喪事養李夫人無不當意者高年公治命析產凡屋宇及諸田富善者悉以予二叔氏太恭人謂中憲公曰吾數子已幸有成立者當一依舅志中憲公喜曰正吾意爾蓋是時子九思已為翰林庶吉士云太恭人性嚴毅有斷制家事無大小隨至而決諸子洎婦雖並居私覲無敢有不敬者海與九思友且有姻契乃數拜太恭人於堂而識其懿訓往往為人道之嘉靖丙戌四月八日庚申

乃太恭人不起矣於戲痛哉距其生正統癸亥十一月二十八日庚戌享年八十有四云太公人生四男子長卯九思丙辰進士翰林院檢討垂九年矣不悅於執事者修

孝宗實錄成

上將增秩史官執事者嗾逆瑾以克拓政事同諸公出之部曹後瑾伏誅諸公皆已復官而九思獨謫壽州同知尋以讒并罷同知以歸次九叙甲子舉人次九皇業農嘗輸金為義民官至九峯戊辰進士以監察御史遷金華知府轉山西按察司副使初九峯以

太恭人思已乃棄官日夜歸事太恭人相聚甚懽也  
未幾太恭人病而九峯亦病太恭人旣卒又二月九  
峯亦卒云孫男子七人長瀛次酉舉人羅江知縣次  
潭早歿次灘渭漢沔孫女子十人長適楊顯次適徐  
永圖次適陳文奎次適張師孟次許劉拱次許何錦  
次適吾子栗太夫人卒後九月亦歿次許何某次許  
邢賓次尚未許曾孫男子二人曰山水曾孫女子一  
人許西安後衛應襲指揮白椿共嗣續之繁衍顯盛  
蓋關內所無有也於戲盛哉今年丁亥十一月十日  
甲申九思等將合葬太恭人於中憲公之兆以銘屬

海海不敢辭姑述其大槩以示世之為人母者太恭人初以九思官封孺人卒後幾月又以九峯金華治行得封命為太恭人而贈府君中憲大夫焉銘曰

繫惟恭人毓靈坤造作配於王克仁允孝篤生良胤絕武周召厥修孔揚方國是徵群桂並榮積善已效衣冠相繹後先如蓮舉志闡華於雍有耀振振蟄蟄惟德斯紹既壽且昌何福不報並空同終六老之兆億萬無數同章懿教

故文林郎知吳橋縣王君墓志銘

弘治初閩中蓋有才子焉言出而文成筆捷而思運

諸關中英俊之士莫不以為難能望望焉不敢與之  
抗見其文覩其誦述目動口嚙心服志報者十恒八  
九吁亦奇矣予自弱冠與之為友顧其天資之美雖  
傳記所稱何以過也乃今卒不能以行見於世忽焉  
卒矣悲夫天之生才也付之以美大純粹之資而又  
嗇其所就使之與物同腐顧非斯人之不幸哉此吾  
友野堂王君仁瑞之卒蓋予有以傷士之不辰而感  
時日之易邁也於戲仁瑞之資豈世之所恒有邪昔  
馬遷讀鵬鳥賦深與其同死生輕去就慨然自失仁  
瑞以名進士試折縣其欲為之志橫博之氣至欲與

宇漢爭高及其退厔林麓澹焉脫焉若亡若寄茲亦  
非綽有餘覩者乎按狀仁瑞姓王氏諱麒上世寶雞  
人也自祖某以來率居鳳翔仁瑞生七歲父琰令就  
學即若成人年十三四殊為知府張公本濟所愛曰  
使其讀書不輟不數年天下無書矣後果中弘治乙  
卯鄉試已未進士辛酉除知吳橋能以法令飭治民  
敬畏之不三年為州守詰罷歸鳳翔年尚銳也即脫  
棄其事日徜徉里閈奕棋賦詩若將終身客至不拘  
有無必置酒款洽雅歌投壘曼如也嘉靖癸未母夫  
人焦氏卒哀毀成疾延及今年戊子二月二十二日

甲子遂不起繇生天順癸未五月九日丁酉春秋六十有六先娶劉氏郡名家女善執婦道先君十五年卒懿德在君之自志生男子一人曰元定女子一人嫁國子監生扶風趙惟珍繼娶李氏鳳翔守禦千戶所鎮撫憲之姊也德似於劉先君七日亦卒生成化乙未十一月二十三日戊辰得年五十有四元定將以九月十六日乙酉合葬君與李孺人於城南劉孺人之壙以予知君為深當銘君之墓石因以所寄於君者道之若夫吳橋人士感德懷惠繪圖立傳諸事則吳橋志與士大夫所誦說者人人知之予不欲贅

君卒時有孫男子四人孫女子一人苗裔盛矣銘曰  
氣凌九有而位不逮心雄萬古而業未竟豈人履之  
靡諧抑天數之有定雍城之南地佳且正子孫振振  
續君之慶享不酬德爾後則競銘以告哀予言匪佞

亡妻安人尚氏墓志銘

安人者故順天推官尚公第二女也母曰賈夫人成  
化乙未九月二十八日甲戌生安人重厚嚴恪不必  
其長知非凡女子矣昔先君子為子擇婚者數年無  
一當者乃後得安人弘治壬子先君子卒又三年乙  
卯安人歸予伉儷二十六年而安人卒焉雖其數有

不可得而易者然奚至於予而數遽如此也於職痛哉安人歸予時年已二十一歲貞靜恭儉有君子之德其裁制事為動與義合氣岸凜然烈丈夫或弗如也妯娌姻姪見安人莫不畏且敬者蓋其意度自能奪人如此也先夫人嘗曰新婦事我克盡孝道且今二十年母一懈也正德戊辰先夫人寢疾安人晝夜不寐者十有七日洎卒號泣幾隕凡人之婦孰不能此者而因心惻怛則安人一人爾於職痛哉方予舉進士第一人莫不喜也安人曰道以無垢為貞名以陵實是懼保貞克懼此君子所以進德修業欲及時

者也尚何言喜邪此其意可與淺見薄識者道邪予歸葬先夫人之三年庚午淡瑾伏誅言官論予為編氓報至安人撫掌曰不垢得垢是謂罔謬而今而後夫子益卒無垢矣非大慶邪省耕視饁鼈勉作業由庚午至庚辰十有一年口食瑣瑣無弗給者所以使予放情丘壑鮮復顧慮秋毫皆安人之力也於歟痛哉安人自初及今事無鉅細未有不自請予而徑行者其恭和弗專亦可見矣卒之日家人婦子號慟罔極若喪所生所立家則歿已三年而率行如在其宜夫克家益予之革故也何不幸不能與之窮年同斃

豈造物者不使人兼嫩並嘉如此也於戲痛哉安人  
所生男女十人其六人皆早夭今止有男子一曰東  
女子三長嫁舉人張之桀次嫁李世貞季嫁馬襲吉  
皆生員也嘉靖二年四月二日癸酉將葬安人之壙  
夫安人之美衆矣人不能詳言者其已載諸家乘不  
欲繁為辭說銘曰 潟西之岡寵嵒崎嶇唐山是名  
爰自我祖返直歸始肇啓茲宇左漆右雍前渭後岐  
地減孔宣非德孰居汝年弗豐汝道則隆篤順克孝  
秉素蘊貞我宗用崇千歲一瞬若旦暨夕詎弗汝齊  
汝復何疑我行弗磷汝名乃偕汝茲休哉

文林郎湯陰縣知縣侯君墓志銘

君諱相字良弼上世故武功人也曾祖某生某某生  
恕有德不仕舉為鄉飲賓娶李氏生男子三人君蓋  
中子也少穎異落脫不拘小行年二十予先君平陽  
公見之謂君叔蒙城丞清曰此兒神清氣美何不令  
之學後侯氏有能亢宗述德者此兒也故遂從為縣  
學諸生弘治己酉果舉鄉試高等明年試禮部不第  
以乙榜為蒲州學正學正九年再試禮部不第尋有  
外艱除服上吏部拜湯陰知縣湯陰邑衝要民貧饑  
若徵役號頑難理君慨然往之日不能寧是邑書可

廢也居一年吏就典列民信執訓湯陰稱治平矣然性喜肆遂不通時宜遇尊官上吏則執禮為敬不若世俗奔走卑屈往往為所損詬雖小事必欲合其約束即尊官上吏不能移未幾有內艱歸明年遂以朝覲考察閑住人以君英爽有氣年又壯健未老也君歎之曰嗟乎世人重為官予重使氣吾欲不失已而官職乃使之是重官不重已非吾志也縣南有橫渠綠野書院因見時嘗牧其野遂自號綠野牧子樂然於家凡十又一年以病腫卒時則正德七年壬申閏五月十又六日已巳也由生景泰丙子三月二十日

己丑春秋蓋五十又七云君易簣時托符尚王來請  
予與語予至則君已漸矣君弟右指予謂君曰為誰  
君曰對山先生也或謂君將有所托君搖首不應予  
恐其終而亂也因語之以順安死之說君勉強為數  
言曰耶何不知死為吾歸子之賢不肖在天豈敢累  
故人所觀故人者銘我墓石使後世知有我云云爾  
又釋倚者手向予揖而止予顧君意歸且未出戶而  
君絕矣蓋予昔未第時君獨重予文謂可名世及病  
又數數以銘石見托乃至其大故猶不能忘此其心  
志所隱蓋何如哉君體順而豐多髯善戲謔而喜飲

無擇於鄉人故鄉人無大小皆樂與君遊君為學生時有文名及為學正湖廣河南皆聘為考試官稱得士云性服善善德人有片長即稱之不置居官克自砥礪欲為循良不知上吏之不可其意卒至貧厄不裕然能慷慨靡撓蔬食豆羹晏如也配張氏側室王氏生男子一人宗史今為縣學生娶長安楊教諭從禮女女子二人長嫁楊玠次嫁鄧際隆孫男子一人主尚幼在襁褓明年癸酉十一月甲申葬新寨先塋之次禮也銘曰 貞而谷惟妣爾後惟爾不回爾光則恢我石孔文惟永翼爾墳

郭處士墓志銘

處士諱理字宗智咸寧人也曾祖曰得成生子道原舉人材為河間府經歷生子恂恂娶李氏生三男子其季者處士也處士穎異有氣以幼有目病不得讀書肆意為家人產即能饒厚有裕無怨恫於父母兄弟之養性又簡易不與人苟合雖身為布衣非有君子之行者弗肯與遊與之遊者皆愛敬若兄弟故人人嚴憚修飭不肯惡處士也醫有齊患者喜奕而不理於業人雖有篤病當奕不肯廢也見處士來卽罷奕應病者病者得惠醫且生故凡病者因其奕皆

來趨處士而惠之醫與處士之方正因風然徧關中  
矣又生不喜酒晚年始少飲酒飲則輒醉醉則掀髯  
微嗟而止人莫能測也終身未嘗一至公府暇日惟  
焚香默坐誦道德經及為善陰隲書客至喜問談山  
川名勝之跡故天下山川名勝者處士能一一道之  
人屢薦處士賓鄉飲堅辭不就正德庚午有

詔給民老壽者冠帶處士時年已八十三竟不受又  
二年壬申二月丁丑以病卒由其生宣德戊申三月  
丁未春秋蓋八十有五配李氏生男子三人鈁錦鏗  
女子三人嫁為趙邦式李娶與太學生李選妻孫男

子二人懋檢孫女子五人一嫁商南學生李相一嫁  
平陽一嫁咸寧學生許陽二尚幼在室鋤錦皆早歿  
而鏗以恭氏詩舉正德丁卯鄉試將以某月甲子葬  
處士於鴻固原新兆乃持表弟間舉人溥狀來請銘  
予舊聞鏗才美志意私甚重之因推其先世而處士  
之名行與溥狀有徵茲為之銘銘曰 惟彼郭氏實  
自號奔於周為宗乃肇郭孫最愧丹秦根枝孔繁汾  
陽始華郭世乃尊及此河間修絜克武會德不繼是  
生恂父三英旣敷處士克字彼克云何非幹厥蠶敦  
德樂益道異祖子孫振振惟鏗孔新昌宗元始惟郭

之珍旣珍我郭心遐弗康卜云鴻固惟公是藏公福  
孔茂保艾爾後世萬彌章我銘在右

對山集卷之三十七